



18. august 2022

UKA 2022/97

Inatsisartut Suleriaasianni § 33 naapertorlugu aalajangiiffisassatut siunnersuut imattoq matumuuna saqqummiuppara:

**Sapigalinnut ulluinnarni nerisassat nioqquissat nunatsinnut ajornannginnerusumik eqqussorsinnaalernissaannut Naalakkersuisut nalunaarusioqquillugit peqquneqarnissaat pillugu**  
**Inatsisartut aalajangiiffisassatut siunnersuut. Nunaniit allaniit nioqquissat taakku eqqussorsinnaanissaannut inatsisitigut qanoq allanguinissaq pisariaqarnersoq, qanorlu akimikkut Danmarkimiit nioqquissanut unammillernerusinnaalersinnaaneri nalunaarusiamut ilanngunneqassapput. Nalunaarusiaq kingusinnerpaamik UKA2023-mi Inatsisartunut agguaanneqassaaq.**

(Inatsisartunut ilaasortaq Aqqalu C. Jerimiassen, Atassut)

#### Tunngavilersuut

Qanorinnikkulluunniit sapingaqrneq takkussinnaavoq, taannalu ulluinnarnittaaq inooriaatsimik allangortitsissariaqanermik annertuumik malitseqartarpooq. Assersuutingalugu immuup akuanik laktosemik sapingaqlersut, ulluinnarni sungiusimalluakkatut nerisariuakkagut arlalippassuit imaliinnarlutik pisinnaajunnaartarpaat.

Atassummiittaarlumi isumaqarpugut, ullutsinni sapingalinnut nioqquut eqqussorneqartut akisuallaarlutillu toqqangassat annikippallaartumik inissisimasut. Nioqquissanik ulluinnarni atorfissaqartitanik nalinginnaasumik sapingaliunngitut toqqangassaannut qaninnerpaamik inissisimatinnissaanut periarfissamik pitsaanerpaamik peqartariaqrneq angujartortariaqarpoq.

Upernassaq ilaatigut tusagassiutitigut ataasiaannaanngitsoq tusarpalput, inoqarfinni arlalissuarni sikusartoqarfimmiusuni, sapingalinnut nioqquutnik suutaarulluinnarsimallutik meerartaminut sapingaqartuuusunut ajornakusoorluinnartumut inissittoortut.

Ajornannginnerusumik nunatta avataaniit suminngaanniilluunniit tikisitsisinnaalernikkut, inatsisip qasukkartinneratigut, inoqarfippassuarni aaqqiissutaalluarsinnaasumik iluarsiisinnaavugut.

Maanna aamma ernumanartut ilai tusartualeqqavaguttaaq, Russit Ukrainillu sorsuunnerisa, Covid-19-illu atuutipiloreerata kinguneranik sorpassuit akitsornerat nunani EU-miittuni malunnarsillualaavereeremat, uagutsinnullu apissillattaalereerlunittaaq. Assersutissaalluarpoq Qallunaat nunaanni nunaatillit kattullutik suliffeqarfissuaataat Arla, ukioq 2022-iinnaap iluani 42%<sup>1</sup> angullugu nersussuit immuisa akiinik qaffaasoqarsimanera BT-mit allaaserineqarpoq, tamannalu soorunami atuisut kaasarfiiniit akilerneqassaaq.

Ilaatigut assersuutitut atorsinnaasoq alla qiviassagaanni, USA-p nunavittaani naalagaaffiini avannarlersaasoq Maine, nersussuup immua liiterimut 33% angullugu akikinnerusutut

<sup>1</sup> <https://ekstrabladet.dk/nyheder/samfund/ny-prisstigning-paa-maelk-historisk-dyrt/9230391>



nalunaarsorneqarsimasoq takuneqarsinnaammat. USA-lu tamaat qallunaat nunaannut agguaqatigiisillugu nioqqutissatigut 7,7%-imik<sup>2</sup> akikinnerusoq nalunaarsorneqarsimalluni.

Inuaqatigiinni sapingalittagut piumassuserinngisaminnik akiliinerujaannarput, nalinginnaasuuvormi nioqqutit laktoseqanngitsut Arlameersut minnerpaamik "nalinginnaasuniik" 2kr-imik akisunerusarnerat<sup>3</sup>. Sulilu nunatsinnut eqqunneqareernermini takornartaasarani akisunerulertarnera.

Taamatuttaarlu ippoq, nunatsinni sukkorermik nappaateqartorpassuarnut. Toqqangassat amerlanerpaarsuunngivipput, akiilu unamminartumeeqqajangivillutik nioqqutissani taakkunani unammillerneq iluamik piunngimmat. Iffiornermi atortut takuinnarsinnaavagut sioraasanut taartitut atorneqartartut qanoq akisunerutigerujussuarneri.

Atassummiit taamaammat pingartuutipparput, inoqatigut piumassuserinngisaminnik sapingaqarnertik pillugu akiliinerujuartarnerata tapiissutinik assigisaanilluunniit aaqqissuussinngikkaluarluni, unammilleqatigiippalaarnerusumut nioqqutissanik eqqussuisarnermut inatsisip aaqqinneratigut iluarsineqarsinnaasoq.

**Aningaasatigut ingerlatsinikkullu pisortanut kingunerisassai:**

Nalunaarusiornissamut nutsertinnissaanullu AC-fuldmægtigellu ukiup affaata ilivitsullu sulineratut naleqassalluni 250.000-500.000 kr.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.

---

<sup>2</sup> <https://www.mylifeelsewhere.com/cost-of-living/united-states/denmark>

<sup>3</sup> <https://foedevareguiden.dk/laktosefri-varer-hvad-er-fordelene-og-ulemperne-2/>